

天一閣藏明代方志選刊

思南府志

一九六二年一月上海古籍

書店據寧波天一閣藏明嘉

靖刻本景印原書版框高二

○九公分寬一四·一公分

思南府志序

思南故宣慰司治永樂中罷
司置府與內郡比百有餘年
漸被文教蔚然移風而西麓
田子以間出之才追琢至行
領袖後生于是薦紳之士彬
彬焉冠于全省矣府故無志

田子喟然述作郡守洪君請
而梓之既成而予以行部至
閱田子所爲志知其有翬翬
憂國之思焉非直以物色山
川備圖籍也夫思南宇內之
僻郡也山谷阨陋獠犵跽伏
在昔開疆羈縻而治故其法

未備境多縵土沃而善樹四方沅冗亡賴匿命此焉逋藪慮不爲土著而胥宇者故其民易動東邇西陽西連真播二三酋長無嚴黜陟豪舉自恣竅窳其民反目而籲天者憤噪螽起軼我彊場池魚之

禍比比懼之皆異省轄屬也
故督課之法難行夫以法令
未備之域雜以易動之民逼
于豪舉自恣之比隣而郡守
縣令制不軍興鋤擊卒有草
竊變安所圖昔之爲思南者
亦難矣田子給事中時嘗建

議于

朝請設按察佐使一員治兵茲

土兼制諸司警備不測

國論韙之竟如所請迺今法制
寢周而姦究稍戢是則田子
有功于父母之邦也志之作
宜首表焉他所稱述固末義

爾夫先王之治天下也慮外
而勤內故政常均其用人也
敬邇而恤遠故士有勸迺今
仕者戀中朝內郡鄙邊方一
閱除書即神氣沮喪墨墨就
列一切自利冀旦夕脫去爲
幸何暇及民夫使仕者懷墨

墨沮喪之心甚非所以攘綏
四表紆

主上旁矚之憂也故曰擇民而
使者非良吏也擇官而宦者
非忠臣也苟以自靖爲心何
論遠近且思南雖遠念其民
獨非先王之苗裔乎出繒粟

供繇役以奉其上甚敬困于
盜賊之擾不相保聚望治于
其上也甚勤然則思南之民
固無負于郡縣長吏也爲郡
縣長吏者獨忍以邊方鄙思
南之民乎此則田子之微意
而未發者予故論序首編俾

後之覽者有政治之資焉若
曰將以披圖籍考山川則信
爲斯志之末義矣

嘉靖十六年春正月人日錢
唐田汝成序



思南府志序終

思南府志序

志也者識也郡之史也以彌
物采域質所稽也以撰風謠
淳礪所識也以永監觀文獻
所屬也古我有邦莫之克廢
也思何闕焉黔荒之遺習也
維是網羅之責秋自叨第以

思南府志
來竊有志矣而未之逮也廼
嘉靖甲午郡博鍾子主節亦
有作矣而事未竟也明年冬
月峯洪公承藩以南都樞佐
出守我邦憲古振文用繼其
役弘敷之暇爰以鍾子之稿
屬予釐正焉凡再閱月績用

告成公乃枉軒蓋過西麓之
草堂而揖予曰是役也有思
以來一舉者也嘉成猷遠子
可無言乎哉西麓子曰嘻方
冊之布未矣予何言也雖然
亦竊聞之矣天下平則文物
盛統勢一則圖志明斯典也

世運關焉者也且有經邦之
道焉昔者先王之御世也立
典式而觀民因風宜而設教
是故陳詩納價以察趨也五
土有辨以致化也書用識之
以永風也九丘之篇邈矣軾
方之典孔子述焉大都爲民

治設也此意而湮即記載之
功盛矣眩于觀詳于文也
奚用哉是錄固無良亦罔或
弗鑒于茲也地里辨方而點
附會以資理也建置原始而
明制則以示守也田賦經國
而昭民隱以長愛也祠祀以